

23 OCT 1997

DR MAHATHIR AHLI KEHORMAT KOLEJ PERUBATAN DIRAJA EDINBURGH.

EDINBURGH, 23 Okt (Bernama) -- Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohd Ali hari ini diterima sebagai ahli kehormat Kolej Pakar Perubatan Diraja Edinburgh.

Dr Mahathir dianugerahkan fellowship kehormat, iaitu rakyat Malaysia yang pertama untuk menerima anugerah seperti itu sementara Dr Siti Hasmah diterima sebagai ahli cemerlang sebagai mengiktiraf sumbangan mereka kepada rakyat Malaysia dan dunia.

Mereka menerima anugerah itu daripada presiden kolej itu Profesor John Cash dalam satu majlis yang diadakan di dewan Great Hall kolej terkemuka ini yang ditubuhkan pada 1681.

Dr Mahathir merupakan antara pemimpin dunia yang menjadi ahli kehormat kolej itu. Pemimpin-pemimpin lain yang menerima anugerah itu ialah bekas Perdana Menteri Singapura Lee Kuan Yew dan bekas Perdana Menteri Pakistan Benazir Bhuto.

Dr Mahathir tiba di sini pagi ini untuk menghadiri mesyuarat Ketua-ketua Kerajaan Komanwel (CHOGM) selama tiga hari yang bermula pada Jumaat.

Di samping menghadiri mesyuarat itu, Perdana Menteri juga dijangka mengadakan perbincangan dengan pemimpin-pemimpin Komanwel termasuk dari Cyprus, Malta, Bangladesh, New Zealand, Australia dan Singapura. -- BERNAMA  
ZS PR